



Dámhachtain Joan Denise Moriarty

Dóibh siúd atá ag tabhairt faoi oiliúint ghairmiúil sa damhsa

Treoirlínte d'iarratasóirí

Maoiniú €5,000

Spríocdháta: 5.30 p.m. (am na hÉireann),
Déardaoin, an 13 Márta 2025

Clár na nÁbhar

1	Eolas faoi Dhámhachtain Joan Denise Moriarty	5
1.1.	Cé atá i dteideal iarratas a dhéanamh?	5
1.2.	Cé nach bhfuil i dteideal iarratas a dhéanamh?	7
1.3.	Cá mhéad ar féidir leat iarratas a chur isteach ina leith?	8
1.4.	Cad iad na costais ar féidir iarratas a dhéanamh orthu?	8
1.5.	Cad iad na gníomhaíochtaí nó na costais nach féidir leat iarratas a dhéanamh orthu?	12
1.6.	Ábhar tacaíochta nach mór duit a chur isteach	13
1.7.	Incháilitheacht – iarratais nach nglacfaimid leo	14
1.8.	Cabhair theicniúil a fháil agus iarratas á chur isteach	15
1.9.	Cabhair a fháil ón bhFoireann Damhsa.....	16
2	Sula ndéanfaidh tú iarratas.....	17
2.1	Bris an próiseas iarratais ina chéimeanna	17
2.2.	Ag clárú i gcomhair cuntas Seirbhísí ar Líne	18
2.3.	A chinntiú go ndéanann tú iarratas faoi d’ainm	21
2.4.	Na bogearraí atá ar do ríomhaire a sheiceáil sula ndéanann tú iarratas	22
2.5	Do chuid ama a ghlacadh chun d’iarratas a ullmhú.....	23
2.6.	Do chuid ábhair thacaíochta a ullmhú	24
2.7.	Naisc URL a ullmhú	27
3	D’fhoirm iarratais a chomhlánú	29

Dámhachtain Joan Denise Moriarty: Foirm Iarratais

4	D'iarratas a chur isteach	30
4.1	Logáil isteach chuig do chuntas chun tús a chur le d'iarratas	30
4.2	Déan do shonraí teagmhála a sheiceáil	30
4.3	Roghnaigh an maoiniú ar mian leat iarratas a dhéanamh air.....	31
4.4	Iontráil méid an mhaoinithe atá á iarraidh.....	31
4.5	Uaslódáil do dhoiciméid	32
4.6	Cuir d'iarratas isteach	33
5	Tar éis duit iarratas a chur isteach – an méid a tharlaíonn ansin	35
5.1	An chaoi a ndéanaimid cinntí	35
5.2	An chaoi a ndéanaimid measúnú ar d'iarratas	37
5.3	Próiseas an phiarphainéil.....	39
5.4	Dearbhú leasa	40
5.5	Na chéad chéimeanna eile sa chás go n-éiríonn le d'iarratas	42
5.6	Na chéad chéimeanna eile sa chás nach n-éiríonn le d'iarratas	43
5.7	Achomharc a dhéanamh.....	43

Spriocdháta: 5.30 p.m., Déardaoin, an 13 Márta 2025

Nótaí tábhachtacha

Teastaíonn [cuntas na Comhairle Ealaíon um Sheirbhísí ar Líne](#) uait chun iarratas a dhéanamh ar Dhámhachtain Joan Denise Moriarty, 2025.

Ní mór duit clárú le haghaidh cuntas Seirbhísí ar Líne ar a laghad cúig lá oibre sula ndéanfaidh tú iarratas.

D'fhéadfadh sé suas le cúig lá oibre a thógáil orainn do chláirúchán a phróiseáil.

Ní mór do d'ainm clárúcháin agus d'ainm an iarratasóra ar an bhfoirm iarratais a bheith in ainm na heagraíochta atá ag déanamh an iarratais. Má fhaigheann tú maoiniú, íocfar isteach i gcuntas bainc na heagraíochta atá ag déanamh an iarratais é.

Iarratasóirí faoi mhíchumas

Déanann an Chomhairle Ealaíon gach iarracht freastal réasúnta a dhéanamh ar dhaoine faoi mhíchumas chun úsáid a bhaint as ár seirbhísí.

Má tá tú faoi mhíchumas agus má theastaíonn cúnamh uait le d'iarratas a chur isteach, déan teagmháil linn a luaithe is féidir roimh an spriocam.

- Teagmhálaí: An tOifigeach Rochtana do Dhaoine faoi Mhíchumas
- Guthán: 01 618 0200 nó 01 618 0243
- Ríomhphost: access@artscouncil.ie

Faigh tuilleadh eolais faoi [chostais rochtana do dhaoine faoi mhíchumas \(ealaíontóirí\)](#).

1 Eolas faoi Dhámhachtain Joan Denise Moriarty

Is dámhachtain de théarma teoranta í Dámhachtain Joan Denise Moriarty, a mhairfidh thar dhá bhliain agus atá á tairiscint i gcuimhne ar an iardhamhsóir bailé, cóiréagrafaí, múinteoir agus stiúrthóir Éireannach, [Joan Denise Moriarty](#)¹).

Beidh an dámhachtain seo i bhfeidhm ó 2025 go 2026. Tá an Chomhairle Ealaíon ina coimeádaí ar iontaobhas Joan Denise Moriarty. Cuireadh de chúram orainn maoirsiú a dhéanamh ar dháileadh an iontaobhais de réir uacht agus thiomna Joan Denise Moriarty.

Insítear sa cháipéis seo duit faoi:

- Cé atá i dteideal iarratas a dhéanamh
- An méid maoiniúcháin ar féidir leat cur isteach air
- Na cineálacha oibre agus gníomhaíochtaí ar féidir leat iarratas a chur isteach ina leith.

1.1 Cé atá i dteideal iarratas a dhéanamh?

Féadfaidh na mic léinn damhsa seo a leanas cur isteach ar Dhámhachtain Joan Denise Moriarty:

¹ (Leabharlanna, 2012)

Spriocdháta: 5.30 p.m., Déardaoin, an 13 Márta 2025

- ladsan atá ag tabhairt faoi oiliúint ghairmiúil sa damhsa san am i láthair
- ladsan ar glacadh leo i gclár damhsa a bhfuil dea-chlú air (ag leibhéal fochéime más féidir) nó i ngairmchlár lánaimseartha.

Chun cloí le rún an iontaobhais seo, leagann an dámhachtain béim ar leith ar bhailé. Tá mic léinn ó gach seánra damhsa i dteideal iarratas a dhéanamh, áfach.

Féadfaidh mic léinn atá paiseanta faoin damhsa agus atá cíocrach chun na hardleibhéil scile agus ealaíonta a theastaíonn le bheith i do dhamhsóir gairmiúil a bhaint amach cur isteach ar Dhámhachtain Joan Denise Moriarty. Leis an dámhachtain seo, tacaítear le damhsóirí a lánacmhainneacht a bhaint amach trí oiliúint ghairmiúil go náisiúnta nó go hidirnáisiúnta.

Le bheith i dteideal iarratas a dhéanamh, ní mór duit na nithe seo a leanas a chomhlíonadh:

- A bheith ina gcónaí i bPoblacht na hÉireann. Ach, i líon teoranta cásanna, féadfaimid glacadh le hiarratais ó lasmuigh de Phoblacht na hÉireann. Sa chás seo, ní mór duit a lua i d'fhoirm iarratais an chaoi a rachadh do thogra chun tairbhe na n-ealaíon i bPoblacht na hÉireann. Chaithfimis a bheith sásta le do mhíniú.
- A bheith os cionn 18 mbliana d'aois.

Nóta maidir le Comhionannas, Éagsúlacht agus Ionchuimsitheacht

Mar chuid dá [mBeartas Comhionannais, Éagsúlachta agus Ionchuimsitheachta](#), cuirimid fáilte roimh iarratais ó gach cuid den phobal.

Dámhachtain Joan Denise Moriarty: Foirm Iarratais

Tá aon cheann de na saintréithe sa liosta thíos le háireamh leis sin, cé nach bhfuil sé teoranta dóibh. Áirítear leis seo freisin tionscnaimh asholáthraíonn deiseanna nó torthaí cothroma do gach duine lena mbaineann.

- Inscne
- Claonadh gnéis
- Stádas sibhialta nó teaghlaigh
- Reiligiún
- Aois
- Míchumas
- Cine
- Ballraíocht den Lucht Siúil
- Cúlra socheacnamaíoch.

Cuirimid fáilte ar leith roimh iarratais ina léirítear éagsúlacht shochaí na hÉireann.

1.2 Cé nach bhfuil i dteideal iarratas a dhéanamh?

Ní bheimid ábalta glacadh le d'iarratas má bhaineann tú le haon cheann de na catagóirí seo:

- Faoi bhun 18
- Eagraíocht

Spriocdháta: 5.30 p.m., Déardaoin, an 13 Márta 2025

- Ag lorg tacaíochta i dtreo táillí le haghaidh ardoideachais/oideachas iarchéime nó staidéir (ina measc sin cúrsaí neamhchreidiúnaithe)
- Tá tú mbun oideachas iarchéime, nó beidh tú ina bhun le linn na tréimhse ina mbeidh an dámhachtain ar fáil
- Tá tú ag cur isteach ar chúrsaí damhsa gearrthéarmacha
- Níl tú i do chónaí i bPoblacht na hÉireann. Féach [1.1 Cé atá i dteideal iarratas a dhéanamh?](#) lena fháil amach faoin eisceacht air sin.
- Cleachtóir ealaíon nó ealaíontóir neamhghairmiúil, is é sin le rá, duine nach bhfuil ag gabháil do na healaíona go gníomhach mar ghairm bheatha.

1.3 Cá mhéad ar féidir leat iarratas a chur isteach ina leith?

Féadfaidh tú iarratas a dhéanamh ar €5,000.

Ní féidir leat iarratas a dhéanamh ar níos mó ná €5,000.

Mar sin féin, féadfaidh ealaíontóirí nó cleachtóirí ealaíon faoi mhíchumas costais rochtana bhreise a chur san áireamh ina n-iarratas. Tá sé seo ar leithligh ón méid a iarrann tú le haghaidh do thogra.

Costais rochtana d'ealaíontóirí nó rannpháirtithe faoi mhíchumas

Tá an Chomhairle Ealaíon tiomanta dár gcláir mhaoinithe agus an obair a mhaoinímid a dhéanamh inrochtana do chách.

Dámhachtain Joan Denise Moriarty: Foirm Iarratais

Tógann an Chomhairle Ealaíon an sainmhíniú ar mhíchumas ó Airteagal 1 de Choinbhinsiún na Náisiún Aontaithe ar Chearta Daoine faoi Mhíchumas, ina sonraítear:

“Áirítear i measc daoine faoi mhíchumas na daoine sin ar a bhfuil mallachair fhadtéarmacha de chineál colainne, meabhrach, intleachtúil nó céadfach ar mallachair iad, nuair a nasctar iad le bacainní éagsúla, a d’fhéadfadh a bheith ina gcúis le cosc ar a rannpháirtíocht iomlán éifeachtach sa tsochaí ar an mbonn céanna le daoine eile.”

Is féidir leat costais rochtana do dhaoine faoi mhíchumas a chur san áireamh le d’iarratas. Tá dhá chineál ann ar féidir leat iarratas a dhéanamh ina leith.

1. Costais rochtana phearsanta nó do rannpháirtí faoi mhíchumas

Ba cheart go mbainfeadh an tacaíocht seo bacainní d'ealaíontóirí nó do rannpháirtithe faoi mhíchumas a bhfuil do thogra á sheachadadh acu. Mar shampla:

- Tusa
- Na príomhealaíontóirí, daoine aonair, grúpaí nó eagraíochtaí a bhfuil baint acu le do thogra
- Comhpháirtithe nó comhoibrithe
- Foireann léiriúcháin
- Príomhfhoireann nó príomhphearsanra riaracháin.

D’fhéadfaí na cinn seo a leanas a áireamh le roinnt samplaí den tacaíocht:

Spriocdháta: 5.30 p.m., Déardaoin, an 13 Márta 2025

- Ateangaire Theanga Chomharthaíochta na hÉireann do rannpháirtí nó do rannpháirtithe
- Seirbhísí oibrí tacaíochta rochtana.
- Am breise cleachtaidh nó sa stiúideo.

Tabhair faoi deara: Is féidir cur isteach ar na costais rochtana phearsanta do dhaoine agus do rannpháirtithe faoi mhíchumas anuas ar an uasmhéid atá ar fáil don dámhachtain.

2. Costais rochtana lucht féachana do dhaoine faoi mhíchumas – costais a bhaineann le do chuid oibre a dhéanamh inrochtana do dhaoine eile

Is costais iad seo chun do chuid oibre a dhéanamh inrochtana do dhaoine faoi mhíchumas agus ba cheart iad a mheas mar ghnáthchuid de do chuid oibre. Táimid ag iarraidh a chinntiú go mbainfidh tuilleadh daoine sásamh as eispéiris ealaíon ar ardchaighdeán agus gur féidir le gach duine rochtain a fháil ar, agus sásamh a bhaint as an obair a mhaoinímid.

Samplaí de chostais rochtana chun do chuid oibre a dhéanamh inrochtana do lucht féachana is ea:

- Ateangaire TCÉ le haghaidh d'imeacht nó le haghaidh do thaibhithe
- Seirbhís tráchtairachta fuaime a úsáid
- Do shuíomh gréasáin a chur in oiriúint do léitheoirí scáileáin
- Ábhair thaispeántais a chruthú i bhformáidí eile amhail Braille nó fuaim.

Tabhair faoi deara: Ba cheart duit costais rochtana lucht féachana do dhaoine faoi mhíchumas a chur san áireamh sa tsuim iomlán a iarrann tú. Ní mór dóibh a bheith laistigh den uasmhéid atá ar fáil don dámhachtain.

Dámhachtain Joan Denise Moriarty: Foirm Iarratais

Cad a tharlóidh má tá an maoiniú a thairgtear dom níos lú ná an méid a d'iarr mé?

Má thairgtear maoiniú duit atá níos lú ná an méid a d'iarr tú, pléifimid leat conas a bheartaíonn tú do ghníomhaíocht mholta a sheachadadh.

Conas iarratas a dhéanamh ar chostais rochtana do dhaoine faoi mhíchumas

Ní mór dúinn tuiscint a fháil ar an bhfáth a bhfuil tú ag cur isteach ar chostais rochtana do dhaoine faoi mhíchumas agus ar an gcaoi a gcomhlíonann siad riachtanais do rannpháirtithe nó do lucht féachana.

Má chuireann tú costais rochtana do dhaoine faoi mhíchumas san áireamh i do thogra, ní mór duit na costais a léiriú in dhá líne ar leithligh den fhoirm iarratais.

- Líne do chostais rochtana phearsanta do dhaoine nó do rannpháirtithe faoi mhíchumas agus sin amháin
- Líne do chostais rochtana phoiblí do dhaoine faoi mhíchumas amháin

Caithfear cáipéis a uaslódáil freisin ina liostaítear na costais sin i dteannta na n-ábhar tacaíochta. Má tá tú ag déanamh iarratas ar chostais rochtana phearsanta do dhaoine faoi mhíchumas agus ar chostais rochtana lucht féachana do dhaoine faoi mhíchumas araon, caithfidh tú doiciméad a áireamh le haghaidh an dá chineáil.

1.4 Cad iad na costais ar féidir iarratas a dhéanamh orthu?

Is féidir leat iarratas a dhéanamh ar mhaoiniú le haghaidh an mhéid seo a leanas:

Spriocdháta: 5.30 p.m., Déardaoin, an 13 Márta 2025

- Táillí, taisteal, cothú, lóistín, ábhair agus acmhainní don oiliúint damhsa ghairmiúil ar mhaith leat dul ina bun
- Trealamh agus ábhair (lena n-áirítear bogearraí) chun cabhrú leat do chleachtas a fhorbairt. Ní féidir leis seo a bheith níos mó ná 15% den mhéid iomlán a iarrann tú.
- Costais rochtana bhreise do shaothar le healaíontóirí nó le cleachtóirí ealaíon faoi mhíchumas.

1.5 Cad iad na gníomhaíochtaí nó na costais nach féidir leat iarratas a dhéanamh orthu?

Ní féidir leat iarratas a dhéanamh ar ghníomhaíochtaí ná ar chostais:

- Nach n-oireann do [chuspóir na dámhachtana](#)
- Nach bhforbraíonn do chleachtas, do scileanna ná d'ealaíontacht
- Atá níos oiriúnaí do dhámhachtainí eile a thairgeann an Chomhairle Ealaíon
- A bhféadfadh tacaíochtaí eile rialtais nó gníomhaireachta poiblí tacú leo amhail Cultúr Éireann, Éire Ildánach, Fís Éireann, Fáilte Éireann, Údarás Craolacháin na hÉireann nó Comhairle Dearaidh agus Ceardaíochta na hÉireann
- A reáchtáladh cheana féin.

1.6 Ábhar tacaíochta nach mór duit a chur isteach

Ní mór duit ábhar tacaíochta a chur san áireamh i dteannta le d'fhoirm iarratais. Is cuidiú atá sna doiciméid sin don duine a bhfuil measúnú á dhéanamh aige ar d'iarratas le tuiscint níos soiléire a fháil ar do thogra.

Mura n-uaslódálann tú ábhar tacaíochta, beidh d'iarratas neamhiomlán agus ní féidir linn measúnú a dhéanamh air. Is é ábhar tacaíochta a bheith in easnamh an chúis is coitianta le hiarratais neamh-incháilithe.

Ní mór duit an fhaisnéis thíos a léamh go cúramach agus an t-ábhar tacaíochta a iarraidimid a chur le d'iarratas.

Ábhar tacaíochta éigeantach do gach iarratasóir

- Do CV nó beathaisnéis iomlán (uaslódáilte mar dhoiciméad ar leith)
- Físeán amháin/dhá fhíseán/trí fhíseán díot féin ag taibhiú, a bhaineann le do thogra
- Litir ghlactha nó ghealltanais ón gcoláiste nó ón institiúid damhsa ina ndeimhnítear freastal nó glacadh.

Ábhar breise i gcásanna áirithe

Má tá costais rochtana do dhaoine faoi mhíchumas san áireamh i d'iarratas, ba cheart duit doiciméad a uaslódáil ina liostaítear na costais sin. Má tá tú ag déanamh iarratas ar chostais rochtana phearsanta do dhaoine faoi mhíchumas agus ar chostais rochtana lucht féachana do dhaoine faoi mhíchumas araon, caithfidh tú doiciméad a áireamh le haghaidh an dá chineál.

Spriocdháta: 5.30 p.m., Déardaoin, an 13 Márta 2025

Déan cinnte de do chostais rochtana iomlána do dhaoine faoi mhíchumas a liostú ar leithligh i do dhoiciméad buiséid féin.

Faigh tuilleadh eolais faoi [chostais rochtana do dhaoine faoi mhíchumas](#) (ealaíontóirí).

1.7 Incháilitheacht – iarratais nach nglacfaimid leo

Ní bheimid ábalta glacadh le d'iarratas sna cásanna seo a leanas.

- Tháinig sé isteach tar éis an spriocdháta d'iarratais.
- Níor uaslódáil tú d'fhoirm iarratais agus d'ábhar tacaíochta trínár dtairseach maoinithe Seirbhísí ar Líne.
- Níor chomhlíon tú na critéir in [1.1 Cé atá i dteideal iarratas a dhéanamh?](#)
- Níor chomhlánaigh tú gach cuid den fhoirm iarratais a bhí riachtanach.
- Níor thug tú an t-ábhar tacaíochta a rabhamar á lorg.
- Níor chuir tú d'ábhar tacaíochta ar fáil san fhoirm cheart. Féach [2.5 Ullmhaigh do chuid ábhair thacaíochta](#).
- D'iarr tú ar níos mó nó ná an méid atá ceadaithe. Más ealaíontóir nó cleachtóir ealaíon faoi mhíchumas thú, áfach, is féidir leat costais rochtana bhreise a iarraidh. Féach [Costais rochtana do dhaoine faoi mhíchumas \(ealaíontóirí\)](#).

Dámhachtain Joan Denise Moriarty: Foirm Iarratais

- Rinne tú iarratas ar ghníomhaíochtaí nó ar chostais nach bhfuil cumhdaithe ag an dámhachtain seo. Féach [1.5 Cad iad na gníomhaíochtaí nó na costais nach féidir leat iarratas a dhéanamh orthu?](#)
- Tá d'iarratas níos oiriúnaí do dhámhachtain eile de chuid na Comhairle Ealaíon. Cuirfimid an dámhachtain eile in iúl duit sa chás sin.

Má tá d'iarratas neamh-incháilithe, ní dhéanfaimid measúnú air. Sa chás sin, beidh tú i dteideal iarratas a dhéanamh an athuair leis an togra céanna i mbabhta maoinithe éigin amach anseo.

1.8 Cabhair theicniúil a fháil agus iarratas á chur isteach

Le tuilleadh a fháil amach faoi úsáid a bhaint as an tairseach maoinithe Seirbhísí ar Líne, gabh chuig [rannán na gCeisteanna Coitianta \(CC\)](#) dár suíomh gréasáin.

Is féidir leat amharc ar ár bhfístreoir freisin ar [d'fhoirm iarratais a íoslódáil, a chomhlánú agus a uaslódáil](#).

Má bhíonn tacaíocht theicniúil uait agus d'iarratas á dhéanamh agat, is féidir leat dul i dteagmháil leis an gComhairle Ealaíon ar na bealaí seo a leanas:

- **Ríomhphost:** onlineservices@artscouncil.ie
- **Guthán:** 01 618 0200 nó 01 618 0243

Déan aon saincheisteanna teicniúla a thuairisciú dúinn chomh luath agus is féidir roimh an spriocdháta (e.g. gan a bheith ábalta do dhoiciméid a uaslódáil).

Spríodhata: 5.30 p.m., Déardaoin, an 13 Márta 2025

Déileáilimid le fiosruithe ar bhonn tús freastail ar an gceann is túisce.

Tabhair faoi deara: is minic a dhéantar anrud glaonna agus an spríodhata ag druidim. Is féidir nach mbeidh tú in ann na glaonna teicniúla tacaíochta a réiteach má fhaighimid tar éis 2.00pm ar an spríodhata iad.

1.9 Cabhair a fháil ón bhFoireann Damhsa

Seol do cheist i ríomhphost chuig elaine.connolly@artscouncil.ie nó adele.kirwan@artscouncil.ie chomh luath agus is féidir.

Tabhair faoi deara: Mura seolann tú chugainn í chomh luath agus is féidir roimh an spríodhata, seans nach mbeidh a dhóthain ama againn freagra a thabhairt duit.

Dámhachtain Joan Denise Moriarty: Foirm Iarratais

2 Sula ndéanfaidh tú iarratas

Ba cheart duit an chuid seo a léamh sula dtosaíonn tú ar d'iarratas.

Tá go leor comhairle mhaith inti chun cabhrú leat d'iarratas a chumadh in am agus ar an mbealach ceart.

2.1 Bris an próiseas iarratais ina chéimeanna

Molaimid an próiseas iarratais a bhriseadh suas sna céimeanna seo a leanas. Cabhróidh sé seo leat a chinntiú go gcríochnaíonn tú d'iarratas in am.

1. Seiceáil an bhfuil tú incháilithe don dámhachtain seo

Ní dhéanaimid measúnú ach ar iarratais a chomhlíonann na critéir incháilitheachta don dámhachtain seo.

Léigh [1.1. Cé atá i dteideal iarratas a dhéanamh](#) agus [1.2 Cé nach bhfuil i dteideal iarratas a dhéanamh](#) (thuas) lena chinntiú gurb í seo an dámhachtain cheart duit.

2. Cláraigh lenár Seirbhísí ar Líne

Ní mór duit cuntas a chruthú ar [thairseach maoinithe Seirbhísí ar Líne](#) de chuid na Comhairle Ealaíon le hiarratas a dhéanamh.

Spriocdháta: 5.30 p.m., Déardaoin, an 13 Márta 2025

Cláraigh go luath. D'fhéadfadh sé suas le cúig lá oibre a thógáil orainn do chlárúchán a phróiseáil.

3. Ullmhaigh do dhoiciméid tacaíochta

Ní mór duit d'ábhar tacaíochta a uaslódáil trí thairseach maoinithe Seirbhísí ar Líne [sna formáidí comhaid cearta](#).

Déan cinnte de go mbeidh dóthain ama agat le do dhoiciméid a ullmhú sna formáidí seo.

4. Cuir d'iarratas isteach ar Sheirbhísí ar Líne

Déan cinnte de go rachaidh tú i dtaithí ar an tairseach maoiniúcháin Seirbhísí ar Líne sula gcuirfidh tú d'iarratas faoi bhráid. Is smaoineamh maith é sin a dhéanamh roimh an spriocdháta.

2.2. Ag clárú i gcomhair cuntas Seirbhísí ar Líne

Ní féidir linn glacadh ach le hiarratais ar líne do Dhámhachtain Joan Denise Moriarty. Ní féidir linn glacadh le foirmeacha iarratais ná le hábhar tacaíochta a dhéantar ar bhealach ar bith eile (mar shampla, trí phost, facs nó ríomhphost).

Teastaíonn [cuntas Seirbhísí ar Líne](#) uait le d'iarratas a chur isteach.

Iarratasóirí nua

Más rud é go bhfuil iarratas á dhéanamh agat den chéad uair, ba cheart duit clárú le haghaidh do chuntais a luaithe agus is féidir.

Dámhachtain Joan Denise Moriarty: Foirm Iarratais

D'fhéadfadh sé suas le cúig lá oibre a ghlacadh orainn an próiseas clárúcháin a chomhlánú duit.

Seolfaidh Seirbhísí ar Líne Uimhir Chlárúcháin Ealaíontóra (ARN) uathúil agus pasfhocal chugat le haghaidh do chuntais laistigh de chúig lá oibre.

Conas clárú

1. Gabh chuig [tairseach maoinithe Seirbhísí ar Líne](#).
2. Clliceáil **Cláraigh**.
3. Roghnaigh Duine aonair.
4. Clliceáil **Ar Aghaidh**.
5. Cuir isteach do sheoladh r-phoist agus uimhir PSP.
6. Clliceáil **Ar Aghaidh**.
7. Faoi **Ainm**, roghnaigh do theideal agus cuir d'ainm isteach.
8. Faoi **Sonraí teagmhála**, cuir isteach do sheoladh baile agus roghnaigh do thír.
9. Faoi **Ríomhphost** agus **PSP**, cuir uimhir theagmhála isteach.
10. Iontráil an cód don scagaire turscair.
11. Clliceáil **Cláraigh**.

Spriocdháta: 5.30 p.m., Déardaoin, an 13 Márta 2025

Iarratasóirí roimhe seo

Má chláraigh tú d’eagraíocht le haghaidh cuntais roimhe seo, ní gá duit clárú le haghaidh cuntas nua don iarratas seo.

Ba cheart duit do chuntas agus do UCÉ atá ann cheana a úsáid chun iarratas a dhéanamh. Má tá dearmad déanta agat ar do phasfhocal, is féidir leat [ceann nua a iarraidh](#).

Riachtanais theicniúla maidir leis na Seirbhísí ar Líne a úsáid

Chun tairseach maoinithe Seirbhísí ar Líne a úsáid, ní foláir do do ríomhaire agus do bhrabhsálaí gréasáin na riachtanais seo a leanas a chomhlíonadh.

RÍOMHAIRE

- Córas oibriúcháin Windows 7 (nó leagan níos nuaí de Windows)
- An leagan is deireanaí de cheann de na brabhsálaithe seo:
 - Microsoft Edge
 - Google Chrome
 - Safari
 - Mozilla Firefox

Mac

- Mac OS X v10.5 Leopard (nó leagan níos nuaí de Mac OS)

Dámhachtain Joan Denise Moriarty: Foirm Iarratais

- An leagan is deireanaí de cheann de na brabhsálaithe seo:
 - Microsoft Edge
 - Google Chrome
 - Safari
 - Mozilla Firefox

2.3. A chinntiú go ndéanann tú iarratas faoi d’ainm

Ní féidir linn aon mhaoiniú a fhaighimid a íoc ach amháin leis an gcuntas bainc atá i dtaisce an ainm atá cláraithe agat a iontráil tú i gcuid 1.1 den fhoirm iarratais.

Ciallaíonn sé sin nach mór d’aon doiciméadacht a chuireann tú isteach mar chuid de d’iarratas a bheith i d’ainm.

Iarratas a dhéanamh faoi d’ainm — sampla

- Déanann tú iarratas chuig an gComhairle Ealaíon le maoiniú a fháil faoin ainm “Maire de Barra”.
- Aon doiciméadacht a chuireann tú faoi bhráid, ní mór di a bheith faoin ainm sin.
- Ní mór do na sonraí bainc agus na sonraí cánach a chuireann tú isteach a bheith faoin ainm seo.
- Ní ghlacfar le leaganacha éagsúla amhail Mary Barry nó Máire Barry.

Spriocdháta: 5.30 p.m., Déardaoin, an 13 Márta 2025

- Má éiríonn le d'iarratas, ní íocfaimid maoiniú ar bith a thairgimid ach amháin isteach i gcuntas bainc atá i seilbh d'ainmse.

2.4. Na bogearraí atá ar do ríomhaire a sheiceáil sula ndéanann tú iarratas

Ní mór duit ríomhaire deisce nó glúine a úsáid chun d'iarratas a chur isteach. Ní féidir iarratas a chur isteach agus fón póca, táibléad nó gléas eile in úsáid agat.

Caithfidh tú Microsoft Word (Ríomhaire Deisce) nó OpenOffice Writer chun d'fhoirm iarratais a chomhlánú. Déan cinnte de go bhfuil ceann amháin de na ríomhchláir seo suiteáilte ar do ríomhaire agat.

OpenOffice a úsáid

Bogearraí saor in aisce is ea OpenOffice Writer is féidir leat a íoslódáil ó [leathanach oifigiúil íoslódálacha OpenOffice](#).

Is féidir leat tuilleadh eolais a fháil maidir le OpenOffice a úsáid chun d'fhoirm iarratais a chomhlánú san [fhíseán seo ón gComhairle Ealaíon](#).

Ní mór duit leagan OpenOffice Writer 4.0.1 nó níos luaithe a úsáid.

Le leaganacha níos déanaí den OpenOffice Writer is féidir an chaoi a dtaispeántar ár bhfoirmeacha iarratais a athrú nuair a chuirtear isteach trí Sheirbhísí ar Líne iad.

Má bhaineann aon fhadhb duit le OpenOffice a shuiteáil nó a úsáid, déan teagmháil le onlineservices@artscouncil.ie a luaithe agus is féidir. Déantar

Dámhachtain Joan Denise Moriarty: Foirm Iarratais

amhlaidh lena chinntiú go mbeidh dóthain ama againn chun cuidiú leat an fhadhb a réiteach.

Nótaí tábhachtacha d'úsáideoirí Apple Mac

Má úsáideann tú Mac leis an gcóras oibriúcháin Mac OS Mojave (10.14) nó níos luaithe, d'fhéadfadh an suíomh gréasáin OpenOffice a insint duit gur gá duit leagan 4.1.1 nó 4.1.2 a íoslódáil.

Déan neamhaird den mholadh seo agus íoslódáil 4.0.1 ina ionad sin.

Má úsáideann tú Mac ar a bhfuil an córas oibriúcháin MAC OS Catalina (10.15) nó níos nuaí, ní bheidh tú ábalta OpenOffice 4.0.1 a íoslódáil. Caithfidh tú leagan OpenOffice 4.1.11 nó níos nuaí a shuiteáil ina ionad.

2.5 Do chuid ama a ghlacadh chun d'iarratas a ullmhú

Ba cheart duit go leor ama a fhágáil chun ullmhú le d'iarratas a chur isteach. Déantar é seo ionas go mbeidh do dhóthain ama agat chun an t-iarratas is fearr is féidir a dhéanamh.

Íoslódáil an fhoirm iarratais ó do chuntas um Sheirbhísí ar Líne a luaithe agus is féidir ionas go mbeidh cur amach agat uirthi.

Déan cinnte de go seiceálann tú an méid seo a leanas:

- Tá tú ag cur isteach ar an dámhachtain cheart
- Tá an fhoirm iarratais cheart íoslódáilte agat
- Comhlíonann d'iarratas na treoirlínte le haghaidh Dhámhachtain Joan Denise Moriarty sa cháipéis seo

Spríodhata: 5.30 p.m., Déardaoin, an 13 Márta 2025

- Tá do dhóthain ama agat chun tascanna an iarratais uile a chomhlánú roimh an spríodhata

Ba cheart duit d'iarratas a uaslódáil ar thairseach maoinithe Seirbhísí ar Líne **48 uair an chloig ar a laghad** roimh an spríodhata, an 13 Márta 2025.

Ar an gcaoi sin, má bhíonn aon fhadhb theicniúil agat, beidh am agat dul i dteagmháil linn chun cuidiú leat.

Tabhair faoi deara: Is minic a bhíonn líon mór úsáideoirí ar Sheirbhísí ar Líne tráthnóna deireanach an spríodhata agus is féidir go dtógfaidh do dhoiciméid i bhfad níos faide ná mar is gnách le huaslódáil.

2.6. Do chuid ábhair thacaíochta a ullmhú

Ní mór duit doiciméid tacaíochta a áireamh le d'iarratas ar líne i dteannta d'fhoirme iarratais. Cabhraíonn sé seo leis an duine a bhfuil measúnú á dhéanamh aige ar d'iarratas chun tuiscint níos soiléire a fháil ar do thogra.

Lena fháil amach an méid a theastaíonn uait a chur isteach, féach [1.9 An t-ábhar tacaíochta a bheidh ort a chur isteach](#).

Ní ghlacfaimid ach leis na doiciméid tacaíochta a uaslódálann tú i bhformáid leictreonach chuig tairseach maoinithe Seirbhísí ar Líne. Má tá doiciméid agat nach bhfuil i bhformáid leictreonach, ba cheart duit iad a scanadh agus a shábháil le go mbeidh tú in ann iad a uaslódáil.

Ba cheart duit do dhoiciméid tacaíochta go léir a chur isteach i gcomhaid ar leithligh freisin.

Dámhachtain Joan Denise Moriarty: Foirm Iarratais

Na formáidí comhaid a nglactar leo

Seiceáil an tábla thíos chun na formáidí comhaid inghlactha is féidir leat a úsáid mar chuid d'iarratas a fheiceáil. Ní féidir leat ach na cineálacha comhaid seo a chur isteach.

Cineál comhaid	Iarmhír chomhadainm
Téacscomhaid	.rtf .doc .docx .txt
Comhaid íomhá	.jpg .gif .tiff .png
Comhaid fuaime	.wav .mp3 .m4a
Comhaid físe	.avi .mov .mp4
Comhaid scarbhileoige	.xls
Comhaid PDF	.pdf



Spriocdháta: 5.30 p.m., Déardaoin, an 13 Márta 2025

Do chomhaid a ainmniú

Is smaoineamh maith é do chomhaid go léir a bhailiú in aon fhillteán amháin ar do ríomhaire ionas gur fusa iad a uaslódáil le chéile.

Úsáid comhadainmneacha a léiríonn go soiléir an méid atá iontu nó an méid a léirítear leo.

Ba cheart go mbeadh sé soiléir ó ainm an chomhaid cibé is CV, bileog buiséid nó cineál eile ábhair thacaíochta atá sa doiciméad.

Seo a leanas roinnt samplaí de chomhaid le hainmneacha soiléire le tabhairt ar chomhaid i gcás iarratasóra darb ainm Jack Russell:

- Jack Russell - Iarratas ar Sparánacht Ailtireachta.docx
- Jack Russell - Gearrhóg Thaibhithe.mp4
- Jack Russell - Costais Rochtana Phearsanta do Dhaoine faoi Mhíchumas.doc

Tabhair faoi deara: Ná húsáid na carachtair " * : < > ? / \ in ainmneacha na gcomhad.

Uasteorainn ar mhéid an chomhaid

Is é **40 MB** an t-uasmhéid iomlán maidir leis an ábhar tacaíochta ar fad a uaslódáiltear le hiarratas amháin.

2.7. Naisc URL a ullmhú

Chun samplaí de do chuid oibre a sholáthar dúinn, is féidir leat na nithe seo a leanas a dhéanamh:

- Iad a uaslódáil go díreach chuig Seirbhísí Ar Líne
- Naisc URL a úsáid (na seoltaí iomlána ina bhfuil d'ábhar óstáilte) chuig ardáin sruthaithe.

Más mian leat naisc a úsáid, cóipeáil na URLanna isteach i ndoiciméad Microsoft Word (Deasc), OpenOffice Writer nó PDF. Ansin, uaslódáil an doiciméad i Seirbhísí Ar Líne i dteannta do dhoiciméad tacaíochta.

Is samplaí áirithe d'ardáin chomhroinnte inghlactha iad YouTube, Vimeo, SoundCloud agus Bandcamp.

Ní ghlacaimid le naisc chuig na foinsí seo a leanas:

- Suíomhanna ar féidir comhaid a roinnt orthu amhail Google Drive nó OneDrive
- Ardáin na meán sóisialta amhail Meta nó Instagram
- Ardáin sruthaithe a chuireann teorainn le rochtain ar shíntiúsóirí íoctha
- Do láithreán gréasáin pearsanta féin.

Tábhachtach: Ní féidir leat ach samplaí oibre a sholáthar trí URLanna a úsáid.

Ní mór duit doiciméid tacaíochta eile amhail CVanna nó litreacha tacaíochta a uaslódáil mar chomhaid.

Spriocdháta: 5.30 p.m., Déardaoin, an 13 Márta 2025

Leideanna chun naisc URL a úsáid

- Ní féidir le measúnóirí úsáid a bhaint ach amháin as naisc URL a chuireann tú ar fáil.
- Déan cinnte de go n-oibreoidh gach nasc a sheolann tú agus go dtabharfaidh na naisc an breathnóir chuig an bhfoinse cheart.
- Déan cinnte de go socróidh tú ceadanna féachana d'ábhair chuig 'Poiblí'.
- Ní bheimid in ann féachaint ar ábhair atá socraithe mar ábhair atá "Príobháideach".
- Más mian leat físeán YouTube a roinnt linn ach nach dteastaíonn uait go mbeadh an físeán poiblí, is féidir leat [socrú príobháideachta d'fhíseáin a athrú go 'Neamhliostaithe'](#).

3 D'fhoirm iarratais a chomhlánú

Tá treoir i ngach cuid den fhoirm iarratais chun cabhrú leat a fháil amach an méid atá le cur san áireamh. Is féidir leat na leideanna thíos a úsáid freisin chun cabhrú leat na ceisteanna san fhoirm a fhreagairt.

Nuair a fhreagraíonn tú iad, smaoinigh ar an méid seo a leanas:

- Do chuntas teiste agus do chumas féideartha
- An chaoi a gcabhróidh do thogra leat scileanna agus smaointe nua a fhorbairt
- An tionchar a d'fhéadfadh a bheith ag do thionscadal (e.g. ar lucht féachana nó ar phobal)
- An chaoi a réitíonn do thogra le réimse do chleachtas
- Cé chomh hinoibrithe agus atá do thogra (e.g. más féidir do thionscadal a chur i gcrích laistigh den bhuiséad agus den fhráma ama a mholtar)

Ní mór duit gach cuid riachtanach den fhoirm iarratais a chomhlánú. Mura ndéanann tú amhlaidh, beidh d'iarratas neamh-incháilithe agus ní féidir linn é a mheasúnú.

Tábhachtach: Tá formáid speisialta ag an iarratas ionas gur féidir linn faisnéis a bhaint uaidh le measúnú a dhéanamh uirthi.

Tá sé fóorthábhachtach go ndéanann tú na nithe seo a leanas:

- Clóscríobh taobh istigh de na boscaí liatha san fhoirm
- Gan iad a scriosadh ná clóscríobh taobh amuigh díobh.

Spriocdháta: 5.30 p.m., Déardaoin, an 13 Márta 2025

Mura gcloíonn tú leis an gcomhairle seo, ní uaslódálfar d'fhoirm iarratais.

4 D'iarratas a chur isteach

Tar éis duit d'fhoirm iarratais a chomhlánú, féadfaidh tú na céimeanna thíos a leanúint chun í a uaslódáil ar shuíomh gréasáin na Seirbhísí Ar Líne agus í a chur isteach.

4.1 Logáil isteach chuig do chuntas chun tús a chur le d'iarratas

1. Téigh chuig [leathanach logála isteach na Seirbhísí Ar Líne](#).
2. Logáil isteach chuig do chuntas.
3. Cliceáil **Déan Iarratas** ag bun an leathanaigh.

4.2 Déan do shonraí teagmhála a sheiceáil

4. Faoi **Dearbhú aitheantais**, seiceáil go bhfuil na sonraí teagmhála cruinn.
 - Má tá siad cruinn: cuir tic leis an ticbhosca in aice le **Deimhnigh go bhfuil do chuid sonraí cruinn.**
 - Mura bhfuil siad cruinn: cliceáil **An gá duit do phróifíl a nuashonrú?** agus déan do shonraí teagmhála a nuashonrú.
5. Cliceáil **Ar Aghaidh**.

4.3 Roghnaigh an maoiniú ar mian leat iarratas a dhéanamh air

6. Faoi Roghnaigh clár maoinithe, roghnaigh 2025 — Dámhachtain Joan Denise Moriarty — Damhsa — Ciste lontaobhais trí úsáid a bhaint as an roghchlár anuas, Maoiniú.
7. Faoi **Dámhachtain atá Ar Fáil**, roghnaigh an fhoirm ealaíne nó an cleachtas ealaíon ábhartha.
8. Iontráil ainm le haghaidh d'iarratais sa réimse **Do thagairt**.
9. Cliceáil **Íoslódáil foirm iarratais** leis an bhfoirm a íoslódáil don dámhachtain seo. [Faigh tuilleadh eolais maidir le d'fhoirm iarratais a chomhlánú](#).
10. Cliceáil **Ar Aghaidh**.

Tabhair faoi deara: Le linn duit an fhoirm a chomhlánú, is féidir go logálfar amach as Seirbhísí ar Líne thú. Is féidir leat síniú isteach arís chun leanúint ar aghaidh le d'iarratas a chur isteach.

4.4 Iontráil méid an mhaoinithe atá á iarraidh

11. Faoi **An méid atá á iarraidh san iarratas**, iontráil an méid ba mhaith leat a iarraidh, an t-ioncam iomlán a bhfuil coinne agat leis, agus an caiteachas iomlán a bhfuil coinne agat leis.

Tabhair faoi deara: Ní gá duit aon ioncam a bheith agat in aghaidh do thogra le bheith incháilithe don dámhachtain. Ach, má tá, ba cheart duit fianaise a thabhairt air mar chuid de d'iarratas.

Spriocdháta: 5.30 p.m., Déardaoin, an 13 Márta 2025

12. Ba cheart gurb ionann an Méid atá á iarraidh agus Caiteachas iomlán lúide Ioncam iomlán.
13. Clliceáil **Ar Aghaidh**.

4.5 Uaslódáil do dhoiciméid

14. Faoi Uaslódáil foirm iarratais, clliceáil Roghnaigh Comhad.
15. Roghnaigh d'fhoirm iarratais ón áit ar shábháil tú í ar do ríomhaire.
16. Clliceáil **Uaslódáil**
Tabhair faoi deara: Má fheiceann tú teachtaireacht a deir 'Ní féidir foirm a uaslódáil', déan iarracht d'fhoirm iarratais a shábháil mar chomhad .doc agus uaslódáil arís í. Murar féidir leat í a uaslódáil fós, [déan teagmháil linn](#).
17. Faoi **Uaslódáil ábhar tacaíochta**, roghnaigh an cineál doiciméid is mian leat a uaslódáil trí úsáid a bhaint as an roghchlár anuas.
18. (Roghnach) Cuir nóta ann chun cur síos a dhéanamh ar an ábhar atá á uaslódáil agat.
19. Clliceáil **Brabhsáil**.
Tábhachtach: Ná roghnaigh 'Postáil doiciméad'.
20. Roghnaigh an comhad ábhair tacaíochta ó do ríomhaire.
21. Clliceáil **Uaslódáil**
22. Déan céimeanna 19–21 arís le haghaidh gach cinn de d'ábhair thacaíochta.
23. Clliceáil **Ar Aghaidh**.

4.6. Cuir d'iarratas isteach

24. Déan na sonraí faoi d'iarratas a sheiceáil go cúramach.
25. Faoi Dearbhú, cuir tic leis an ticbhosca in aice le Aontaím leis an dearbhú thuas.
26. Cliceáil **Cuir isteach**.

Nótaí faoi d'iarratas a chur isteach

- Cliceáil **Sábháil Dréacht** tráth ar bith chun d'iarratas a shábháil gan é a chur isteach.
- Is féidir leat teacht ar ais chuig d'iarratas agus athruithe a dhéanamh air go dtí go gcuirfidh tú isteach é.
- Tar éis duit d'iarratas a chur isteach, ní bheidh tú in ann aon athrú eile a dhéanamh. Athbhreithnigh d'fhoirm iarratais go cúramach sula seolfaidh tú isteach í.
- Má thugann tú faoi deara go bhfuil botún déanta agat **tar éis** duit d'iarratas a chur isteach, [téigh i dteagmháil linn chomh luath agus is féidir](#).

An dteastaíonn tacaíocht theicniúil uait?

Déan teagmháil linn má bhíonn tacaíocht theicniúil uait agus d'iarratas á chur isteach agat.

- **Ríomhphost:** onlineservices@artscouncil.ie

Spriocdháta: 5.30 p.m., Déardaoin, an 13 Márta 2025

- **Guthán:** 01 618 0200 nó 01 618 0243

Ní féidir linn tacaíocht theicniúil a ráthú duit má chuireann tú glaoch tar éis 2.00pm ar an spriocdháta.

5 Tar éis duit iarratas a chur isteach – an méid a tharlaíonn ansin

Tar éis duit d'iarratas a chur isteach, gheobhaidh tú an méid seo a leanas:

- Ríomhphost láithreach chun a chur in iúl duit go bhfuairamar d'iarratas
- An dara ríomhphost cúpla nóiméad ina dhiaidh sin le d'uimhir iarratais.

Tabhair faoi deara: Mura bhfaigheann tú na ríomhphoist sin uainn, déan teagmháil linn ag onlineservices@artscouncil.ie a luaithe agus is féidir.

Do do chinneadh, gheobhaidh tú:

- Ríomhphost laistigh de 10-13 seachtaine a inseoidh duit **murar** cuireadh d'iarratas ar an ngearrliosta. Má chuirtear d'iarratas ar ghearrliosta, déanfaidh an coiste athbhreithniú air.
- Ríomhphost laistigh de 12-15 seachtaine a inseoidh duit má d'éirigh le d'iarratas nó murar éirigh leis.

Tabhair faoi deara: Braitheann an t-achar ama sin ar líon na n-iarratas a fhaighimid.

5.1 An chaoi a ndéanaimid cinntí

Déanann an Chomhairle Ealaíon measúnú ar gach iarratas incháilithe a fhaighimid. Déanaimid cinntí maidir leis na hiarratais sin agus cuirimid ár gcinntí in iúl d'iarratasóirí de réir ár nósanna imeachta.

Spriocdháta: 5.30 p.m., Déardaoin, an 13 Márta 2025

Is é an aidhm atá againn a chinntiú go bhfuil córas cothrom trédhearcach ann maidir le maoiniú a dhámhachtain.

Próiseálaimid na hiarratais go léir a fhaighimid mar a leanas:

- Déanaimid [incháilitheacht an iarratais](#) a sheiceáil. Téann gach iarratas incháilithe ar aghaidh chuig an gcéim mheasúnaithe.
- Cuirimid gach iarratasóir neamh-incháilithe ar an eolas trí ríomhphost.
- I roinnt cásanna, d'fhéadfaimis a bheith den bharúil go mb'fhéidir nach é an réimse ealaíon a ndearna tú iarratas air ar an gceann is oiriúnaí do do thogra. Sna cásanna sin, rachaimid i dteagmháil leat agus fiafróimid díot má tá tú sásta go mbogfar d'iarratas chuig foireann ealaíon níos oiriúnaí. Is féidir leat rogha a dhéanamh ansin é a bhogadh nó é a fhágáil mar atá sé.
- Déanann foireann agus comhairleoirí na Comhairle Ealaíon measúnú ar iarratais incháilithe bunaithe ar na critéir mheasúnaithe agus ar ár bpróiseas scórála.
- Molann foireann agus comhairleoirí na Comhairle Ealaíon roinnt iarratas don ghearrliosta.
- Déanann an piarphainéal athbhreithniú ar na hiarratais go léir ar an ngearrliosta agus an t-ábhar tacaíochta a bhaineann leo. Cuireann an painéal scór leis na hiarratais agus déanann sé na cinntí ansin.
- Cuirimid na cinntí in iúl trí ríomhphost d'iarratasóirí.
- Tugann bord na Comhairle Ealaíon cinntí an mheasúnóra faoi deara.

Is í an fhoireann ealaíon don dámhachtain a roghnaigh tú sna Seirbhísí ar Líne príomh-mheasúnóir d'iarratais.

Dámhachtain Joan Denise Moriarty: Foirm Iarratais

Má roghnaigh tú foirmeacha ealaíon nó cleachtais ealaíon eile i d'iarratas freisin, is féidir go n-iarrfaidh an príomh-mheasúnóir ar fhoirne ealaíon eile measúnú a dhéanamh air.

5.2 An chaoi a ndéanaimid measúnú ar d'iarratas

Is dámhachtainí iomaíocha iad dámhachtainí na Comhairle Ealaíon. Déanaimid iarratais a mheasúnú sa chomhthéacs iomaíoch sin. Tabharfaimid san áireamh freisin na hacmhainní a bhíonn ar fáil do na hiarratasóirí.

Déanfar d'iarratas a mheasúnú ar bhonn na nithe seo a leanas:

- Caighdeán ealaíonta
- Na bealaí ina gcomhlíonann an togra cuspóirí agus tosaíochtaí na dámhachtana
- Indéantacht.

Caighdeán ealaíonta

I gcás ár measúnaithe ar chaighdeán ealaíonta, dírithe ar do chleachtas ealaíontóra roimhe seo agus ar an gcineál togra atá ann.

Sa mheasúnú seo, cuirtear an méid seo a leanas san áireamh:

- An cumas atá léirithe agat san fhoirm iarratais
- Do CV agus na hábhair thacaíochta eile a chuir tú isteach
- Cuntas teiste an chláir ar thug tú breac-chuntas air san fhoirm iarratais

Spriocdháta: 5.30 p.m., Déardaoin, an 13 Márta 2025

- An cleachtas atá léirithe agat leis an ábhar tacaíochta a chuir tú isteach
- An uaimhian, an úrnuacht agus an inniúlacht atá léirithe agat.

Cuspóirí agus tosaíochtaí na dámhachtana a chomhlíonadh

Déanaimid iarratais a mheasúnú de réir a fheabhas a éiríonn leo cuspóirí agus tosaíochtaí na dámhachtana a chomhlíonadh. Féach [Eolas faoi Dhámhachtain Joan Denise Moriarty](#) le haghaidh tuilleadh sonraí.

Sa mheasúnú seo, cuirtear an méid seo a leanas san áireamh:

- An méid tairbhe a bhainfeadh do chleachtas ealaíon as an ngníomhaíocht mholta agus conas mar a d'fhéadfaí é a fhorbairt mar thoradh air sin
- Conas mar a théann do ghníomhaíocht mholta i ngleic le tosaíochtaí na dámhachtana.

Indéantacht

Déanfaimid indéantacht d'iarratais a mheasúnú, bunaithe ar an gcaoi a léiríonn tú do chumas chun do ghníomhaíochtaí beartaithe a sholáthar.

Braithfidh na gnéithe indéantachta a ndéanfaimid measúnú orthu ar an snáithe a roghnaíonn tú.

Sa mheasúnú seo, cuirtear an méid seo a leanas san áireamh:

- Indéantacht do chlár ama nó do sceidil bheartaithe

Dámhachtain Joan Denise Moriarty: Foirm Iarratais

- An méid maoinithe atá á lorg agat i gcomparáid le nádúr agus fad na hoibre beartaithe ó thaobh na hindéantachta de
- Más ábhartha, infhaighteacht na dtacaíochtaí/na gcomhpháirtithe eile a d'ainmnigh tú san iarratas.

5.3 Próiseas an phiarphainéil

Bainimid úsáid as piarphainéil ionas go mbeidh réimse de shaintuairimí inár bpróiseas meastóireachta.

Bíonn ar a laghad triúr breithneoirí seachtracha ar phiarphainéal. Go ginearálta, bíonn an méid seo a leanas ag na moltóirí seo:

- Saineolas ábhartha san fhoirm ealaíne
- Saineolas cleachtais ealaíon
- Eolas leathan oibre agus tuiscint ghinearálta ar na healaíona gairmiúla.

I gcás foirmeacha ealaíne a ndéantar líon níos lú iarratas ina leith, féadfaimid painéil a thionól chun grúpaí iarratas a mheas ag an gcruinniú céanna den phainéal.

Bíonn comhalta de chuid na Comhairle Ealaíon i gceannas ar gach cruinniú piarphainéil de ghnáth agus gníomhaíonn an comhalta sin mar chathaoirleach gan ceart vótála. Freastalaíonn foireann na Comhairle Ealaíon agus na comhairleoirí freisin más gá. Bíonn baill foirne a raibh baint acu i measúnú tosaigh na n-iarratas ar fáil chun eolas a thabhairt do na piarphainéil más gá.

Spriocdháta: 5.30 p.m., Déardaoin, an 13 Márta 2025

Beidh rochtain ag lucht an phainéil ar gach iarratas ar an ngearrliosta agus ar an ábhar gaolmhar go léir roimh lá an chruinnithe. Le linn an chruinnithe, déanann siad na hiarratais ar an ngearrliosta a athbhreithniú, a phlé agus a scóráil. Ansin déantar na hiarratais ar an ngearrliosta a rangú de réir an scóir.

Tabhair faoi deara: Tá leibhéal ard iomaíochta ann do na dámhachtainí. Ní féidir leis an gComhairle Ealaíon ach maoiniú a chur ar fáil do sciar na n-iarratas a fhaighimid.

Próiseas scórála an phainéil

Iarraimid ar gach ball painéil na hiarratais a scóráil de réir an chórais seo a leanas:

- **A – Caithear a Mhaoiniú (10 bpointe):** Comhlíonadh critéir go léir na dámhachtana san iarratas agus tá maoiniú tuillte aige ar an mbonn sin, suas leis an méid atá á iarraidh (más féidir).
- **B – Ba Chóir a Mhaoiniú (8 bpointe):** Chomhlíon an t-iarratas na critéir a mhéid is leor agus tá maoiniú tuillte aige dá bharr sin, má tá buiséad na scéime maoinithe sách mór.
- **C – D’fhéadfaí a Mhaoiniú (5 phointe):** Comhlíonadh na critéir san iarratas, ach ní an oiread céanna leis na hiarratais eile.
- **D – Ní Tosaíocht é (2 phointe):** Níor chomhlíon an t-iarratas na critéir maith go leor agus níl maoiniú tuillte aige dá bharr sin.

5.4 Dearbhú leasa

Tá Beartas maidir le Coinbhleacht Leasa (CL) ag an gComhairle Ealaíon lena chinntiú nach mbíonn tionchar éagórach le brath sa phróiseas measúnaithe.

Dámhachtain Joan Denise Moriarty: Foirm Iarratais

Le cóir agus cothroime sa chinnteoireacht a áirithiú, ní mór do bhaill foirne, do chomhairleoirí agus do phainéalaithe coinbhleacht leasa a dhearbhu i gcás ina bhfuil:

- Dlúthcheangal pearsanta nó gairmiúil acu leis an iarratasóir
- siad nasctha ar aon bhealach leis an iarratas.

Is féidir le ‘leas’ a bheith ar bhonn ‘airgeadais’ nó ‘neamhairgeadais’.

- Féadann ‘leas’ a bheith ina ‘leas airgid’: ina bhféadfadh duine tairbhe airgeadais a bhaint as cinneadh
- Féadann leas a bheith ina ‘leas neamhairgid’: gaol muintire, nó comhpháirtíochtaí, caidrimh phearsanta, nó comhpháirtíochtaí gnó idir fhoirmiúil agus neamhfhoirmiúil, etc.

Ní mór don bhall foirne, don chomhairleoir nó don phainéalaí a leas a dhearbhu a luaithe agus is eol dóibh é.

Cinntoidh an Chomhairle Ealaíon nach mbeidh baint ag an mball foirne, ag an gcomhairleoir ná ag an bpainéalaí le haon ghné den phróiseas cinnteoireachta a bhaineann leis an iarratas seo.

Dearbhú leasa na bpainéalaithe

Ní mór do lucht an phainéil aon coinbhleacht leasa a fhógairt a luaithe agus is eol dóibh í. D’fhéadfadh sé sin tarlú ag an bpointe nuair a iarrtar air/uirthi suí ar an bpainéal (más eol an ‘leas’ ag an bpointe sin) nó tar éis liosta na n-iarratasóirí a fháil.

Nuair a fhógraíonn painéal coinbhleacht leasa, ní bhfaighidh siad ábhar meastóireachta maidir leis an iarratasóir sin. Beidh air nó uirthi an seomra a

Spriocdháta: 5.30 p.m., Déardaoin, an 13 Márta 2025

fhágáil nuair a bhíonn an t-iarratas ar leith á athbhreithniú. Vótálfaidh an Cathaoirleach in ionad an phainéalaí.

I roinnt cásanna, d'fhéadfadh sé nach n-aithneodh comhalta painéil go bhfuil coinbhleacht leasa ann go dtí go bhfaigheann agus go ndéanann sé/sí athbhreithniú ar an ábhar meastóireachta. Sna cásanna sin, ní mór don phainéalaí ball foirne den Chomhairle Ealaíon nó cathaoirleach an phainéil a chur ar an eolas chomh luath agus a thuigeann siad go bhféadfadh coinbhleacht leasa a bheith i gceist.

Má chuireann beirt ón bpainéal in iúl go bhfuil coinbhleacht leasa acu i leith aon iarratais amháin, beidh an cathaoirleach páirteach mar chuid den phróiseas cinnteoireachta i gcás an iarratais shonraigh sin.

Má tá coinbhleacht leasa ag Cathaoirleach ainmnithe an phainéil, ní mór dóibh é sin a dhearbhú a luaithe agus is eol dóibh go bhfuil a leithéid ann agus an fógra sin a thabhairt i scríbhinn roimh an gcruinniú. Sa chás sin, beidh ceann na foirne ealaíon ábhartha mar chathaoirleach ar an bplé a dhéanfar maidir leis an iarratas.

5.5 Na chéad chéimeanna eile sa chás go n-éiríonn le d'iarratas

Má éiríonn leat, seolfaimid ríomhphost chugat le tairiscint ann.

Cuirfear litir thairisceana chugat ina sonrúfar méid an mhaoinithe atá tugtha againn, agus téarmaí agus coinníollacha na dámhachtana. Gheobhaidh tú faisnéis freisin faoin gcaoi le do dhámhachtain a tharraingt anuas.

Ní mór duit glacadh le do thairiscint mhaoinithe trí do chuntas Seirbhísí ar Líne.

Dámhachtain Joan Denise Moriarty: Foirm Iarratais

Gheobhaidh tú an treoir íocaíochta maidir leis an dámhachtain seo i ríomhphost ar leithligh. Tá treoracha ann ar an dóigh le glacadh le do thairiscint agus an maoiniú a tharraingt anuas.

5.6 Na chéad chéimeanna eile sa chás nach n-éiríonn le d'iarratas

Faigheann an Chomhairle Ealaíon líon mór iarratas. Bíonn an t-éileamh ar mhaoiniú i gcónaí níos mó ná na hacmhainní atá le fáil.

Mura n-éireoidh le d'iarratas, is féidir leat aiseolas a iarraidh ar fhoireann na Comhairle Ealaíon.

Tabhair faoi deara: Má chomhlíonann tú ár dtreoirínte maidir le hincháilitheacht agus nósanna imeachta d'iarratais, ní rathú é sin go bhfaighidh tú maoiniú.

Iarratas a dhéanamh an athuir leis an ngníomhaíocht chéanna

Mura n-éiríonn le d'iarratas, ní féidir leat iarratas a dhéanamh ar an ngníomhaíocht chéanna do dhámhachtain eile na Comhairle Ealaíon.

Má cheapaimid gur fearr a oireann do thogra do dhámhachtain dhifriúil, féadfaimid eisceacht a dhéanamh.

Sa chás sin, rachaimid i dteagmháil leat.

5.7 Achomharc a dhéanamh

Is féidir leat achomharc a dhéanamh i gcoinne cinnidh maoinithe más rud é go gceapann tú:

Spriocdháta: 5.30 p.m., Déardaoin, an 13 Márta 2025

- Níor chloíomar lenár nósanna imeachta foilsithe don riarachán agus don mheasúnú
- Níor chuireamar i bhfeidhm ár nósanna imeachta foilsithe don riarachán agus don mheasúnú go cóir.

Ní mór duit a bheith in ann na cúiseanna le d'achomharc a thaispeáint dúinn.

[Tuilleadh eolais faoinár bpróiseas achomharc](#)